



WALES AUDIT OFFICE  
SWYDDFA ARCHWILIO CYMRU

Archwilydd Cyffredinol Cymru  
Auditor General for Wales

# Adroddiad er budd y cyhoedd – methiannau o ran trefniadau rheoli ariannol a llywodraethu – **Cyngor Cymuned Llanwnnen**

Blwyddyn archwilio: 2015-16 a 2016-17

Cyhoeddwyd: Medi 2018

Cyfeirnod y ddogfen: 545A2018-19

Mae'r adroddiad hwn er budd y cyhoedd wedi ei baratoi yn unol ag Adran 22 o Ddeddf Archwilio Cyhoeddus (Cymru) 2004. Ni dderbynnir cyfrifoldeb mewn perthynas ag unrhyw swyddog, aelod nac unrhyw berson arall yn unigol nac unrhyw drydydd parti.

Os gwneir cais am wybodaeth y gallai'r ddogfen hon fod yn berthnasol iddi, tynnir sylw at y Cod Ymarfer a gyhoeddwyd o dan adran 45 o Ddeddf Rhyddid Gwybodaeth 2000. Mae Cod adran 45 yn nodi'r arfer a ddisgwylir gan awdurdodau cyhoeddus wrth ymdrin â cheisiadau, yn cynnwys ymgynghori â thrydydd partïon perthnasol. Mewn perthynas â'r ddogfen hon, mae Archwilydd Cyffredinol Cymru a Swyddfa Archwilio Cymru yn drydydd partïon perthnasol. Dylid anfon unrhyw ymholiadau ynglŷn â datgelu neu aildefnyddio'r ddogfen hon i Swyddfa Archwilio Cymru yn [swyddog.gwybodaeth@archwilio.cymru](mailto:swyddog.gwybodaeth@archwilio.cymru).

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi. We welcome correspondence and telephone calls in Welsh and English. Corresponding in Welsh will not lead to delay.

This document is also available in English. Mae'r ddogfen hon hefyd ar gael yn Saesneg.

Deryck Evans a gyflawnodd y gwaith, o dan gyfarwyddyd Anthony Barrett.

# Cynnwys

Gan weithredu o dan drefniadau dirprwyedig ac ar ran Archwilydd Cyffredinol Cymru, rwyf wedi cyhoeddi'r adroddiad hwn o dan adran 22 o Ddeddf Archwilio Cyhoeddus (Cymru) 2004, er mwyn tynnu sylw'r cyhoedd at fethiannau mewn trefniadau llywodraethu ac annigonolrwydd o ran trefniadau rheoli ariannol a rheolaeth fewnol yng Nghyngor Cymuned Llanwnnen.

Mae'r Archwilydd Cyffredinol yn bwriadu cyhoeddi adroddiad archwilio amodol ar Ddatganiadau Blynyddol y Cyngor ar gyfer blynyddoedd ariannol 2015-16 a 2016-17.

## Canfyddiadau manwl

Cyflwyniad	4
Ni chyflwynodd y Cyngor ei gyfrifon blynyddol ar gyfer 2015-16 a 2016-17 i mi eu harchwilio yn unol â'r amserlen statudol	5
Nid oes digon o dystiolaeth i gadarnhau p'un a oes trefniadau priodol wedi'u gwneud ar gyfer arfer hawliau cyhoeddus ai peidio	6
Mae'r Cyngor wedi methu â chynnal cofnodion cyfrifyddu priodol i gofnodi ei incwm a'i wariant ar gyfer 2015-16 a 2016-17	6
Mae'r Cyngor wedi methu â chynnal trefniadau priodol i weinyddu'r gyflogres	7
Ni pharatôdd y Cyngor gyllideb ar gyfer 2015-16 na 2016-17 ac ni chymeradwyodd y praesept a godwyd ar dalwyr y dreth gyngor ar gyfer y blynyddoedd ariannol hyn	8
Er bod gan y Cyngor wefan, nid yw'n cyhoeddi pob dogfen y mae'n ofynnol iddo ei chyhoeddi yn electronig	8
Camau gweithredu a gymerwyd eisoes gan y Cyngor	9
Argymhellion	9
Y camau nesaf	10

# Canfyddiadau manwl

## Cyflwyniad

- 1 Cyhoeddwyd yr adroddiad hwn er budd y cyhoedd o dan Adran 22 o Ddeddf Archwilio Cyhoeddus (Cymru) 2004 (y Ddeddf). Rwyf wedi cyhoeddi'r adroddiad hwn er mwyn tynnu sylw'r cyhoedd at fethiannau mewn trefniadau llywodraethu ac annigonolrwydd o ran trefniadau rheoli ariannol a rheoli mewnol yng Nghyngor Cymuned Llanwnnen. Credaf ei bod yn bwysig bod gan y cyhoedd ymwybyddiaeth lawn a phriodol o'r digwyddiadau sy'n ymwneud â'r Cyngor.
- 2 Rwyf hefyd yn credu ei bod yn briodol rhoi cyfle i'r Cyngor ddangos y camau pwysig a gymerwyd eisoes i wella trefniadau ac i sicrhau bod y risg y bydd methiannau mewn trefniadau llywodraethu o'r fath yn digwydd eto yn cael ei lleihau gymaint â phosibl. Mae gwersi i'w dysgu gan y Cyngor, a hefyd gan bob cyngor cymuned yng Nghymru.
- 3 Lleolir y Cyngor yng Ngheredigion ac mae'n gwasanaethu tua 350 o etholwyr a thrigolion eraill yng nghymunedau Llanwnnen a Llanbedr Wledig. Mae gan y Cyngor wyth aelod etholedig ac mae'n gwario tua £3,000 i £3,500 y flwyddyn ar wasanaethau lleol. Mae'n ariannu hyn drwy gyfrwng praesept o tua £3,200 gan Gyngor Sir Ceredigion. Mae'r Cyngor Sir yn casglu'r praesept drwy dreth gyngor ychwanegol a godir ar drigolion y Cyngor. Daw cyllid Cyngor Cymuned Llanwnnen o bwrs y wlad a chaiff ei aelodau ei ethol gan drigolion lleol. Felly, mae'r Cyngor yn atebol i'r etholaeth leol.
- 4 Mae cynghorau cymuned megis Llanwnnen, oherwydd eu natur leol fach iawn, fel arfer yn dibynnu ar un swyddog allweddol, y Clerc, i reoli eu materion gweinyddol. Yn amlach na pheidio, penodir y Clerc hefyd fel Swyddog Ariannol Cyfrifol. Mae'r Swyddog Ariannol Cyfrifol yn gyfrifol am weinyddu materion ariannol y Cyngor o ddydd i ddydd. Yn benodol, mae hyn yn golygu derbyn a chofnodi incwm, paratoi taliadau siec i'w llofnodi gan aelodau, cynnal y cofnodion cyfrifyddu a pharatoi'r datganiadau cyfrifyddu blynyddol.
- 5 Yn ôl y gyfraith (Rheoliadau Cyfrifon ac Archwilio (Cymru) 2014 (y Rheoliadau)), y Cyngor (hynny yw, yr aelodau) sy'n gyfrifol am warchod arian y Cyngor, gan gynnwys sicrhau trefniadau rheoli ariannol effeithiol ac effeithlon. Mae hyn yn cynnwys pethau fel sefydlu system rheolaeth fewnol briodol, gan gynnwys dull archwilio mewnol, a chymeradwyo'r datganiadau cyfrifyddu blynyddol cyn eu cyflwyno i'r archwilydd allanol i'w harchwilio.
- 6 Mae cyfeiriadau at y Clerc yn yr adroddiad hwn yn cyfeirio at y clerch blaenorol, Miss Eleri Jones. Deallaf nad yw Miss Jones yn cael ei chyflogi gan y Cyngor mwyach.

## Ni chyflwynodd y Cyngor ei gyfrifon blynyddol ar gyfer 2015-16 a 2016-17 i mi eu harchwilio yn unol â'r amserlen statudol

- 7 O dan Adran 13 o'r Ddeddf rhaid i'r Cyngor wneud y canlynol:
  - paratoi ei gyfrifon bob blwyddyn hyd at 31 Mawrth neu'r cyfryw ddyddiad arall ag y gall Gweinidogion Cymru ei gyfarwyddo yn gyffredinol neu mewn unrhyw achos arbennig; ac
  - sicrhau y caiff ei gyfrifon eu harchwilio yn unol â'r Ddeddf.
- 8 Caiff y cyfrifon eu paratoi ar ffurf datganiad blynyddol syml a anfonir i'r Cyngor bob blwyddyn. Mae Rheoliad 15 o'r Rheoliadau yn ei gwneud yn ofynnol i'r cyngor gymeradwyo'r cyfrifon cyn 30 Mehefin ar ôl diwedd y flwyddyn ariannol.
- 9 Nid yw'r Cyngor wedi cydymffurfio â'r terfynau amser statudol ar gyfer paratoi a chymeradwyo ei gyfrifon ar gyfer blwyddyn ariannol 2015-16 na blwyddyn ariannol 2016-17.

### Arddangosyn 1: dyddiadau cwblhau'r cyfrifon

Blwyddyn ariannol	Dyddiad y dylai'r cyfrifon fod wedi cael eu cymeradwyo gan y Cyngor	Dyddiad y cawsant eu cymeradwyo gan y Cyngor
2015-16	30 Mehefin 2016	01 Rhagfyr 2017
2016-17	30 Mehefin 2017	01 Rhagfyr 2017

- 10 Mae fy adolygiad o gofnodion y Cyngor yn fy arwain i gredu na chyflwynodd y Clerc, Miss Eleri Jones, gyfrif cyflawn na mantoledig i'r Cyngor o'i berfformiad wrth gydymffurfio â'r terfynau amser hyn. Ysgrifennodd aelod o'm tîm archwilio at y Clerc ym mis Awst 2017 a chyfarfu â'r Clerc a'r Cadeirydd ym mis Hydref 2017 i drafod y ffaith bod y cyfrifon wedi cael eu cyflwyno'n hwyr.
- 11 Er bod anallu'r Clerc blaenorol i gyflwyno cyfrifon ar amser yn ffactor arwyddocaol o ran methiant y Cyngor i gydymffurfio â'i gyfrifoldebau statudol, rhaid i'r Cyngor ei hun ysgwyddo rhywfaint o'r cyfrifoldeb am y methiant hwn. Nid wyf wedi canfod unrhyw dystiolaeth bod y Cyngor wedi cymryd unrhyw gamau mewn perthynas â'r cyfrifon hwyr.

## Nid oes digon o dystiolaeth i gadarnhau p'un a oes trefniadau priodol wedi'u gwneud i arfer hawliau cyhoeddus ai peidio

- 12 Mae adrannau 30 a 31 o'r Ddeddf yn darparu ar gyfer hawliau cyhoeddus i edrych dros y cyfrifon sydd i'w harchwilio, holi'r archwilydd am y cyfrifon a chyflwyno gwrthwynebiadau i'r archwilydd ynglŷn ag unrhyw fater y mae gan yr archwilydd bŵer i wneud y canlynol mewn perthynas ag ef:
- gwneud cais am ddatganiad bod eitem yn y cyfrifon yn anghyfreithlon; a
  - unrhyw fater arall y mae gan yr archwilydd y pŵer i lunio adroddiad o dan adran 22 o'r Ddeddf mewn perthynas ag ef.
- 13 Mae Rheoliad 17 yn ei gwneud yn ofynnol i'r Corff hysbysu'r cyhoedd, drwy hysbyseb, mewn un neu fwy o fannau amlwg, gan nodi'r cyfnod pryd y bydd y cyfrifon a'r dogfennau eraill ar gael i'w harchwilio a rhoi'r manylion canlynol:
- y man lle byddant ar gael felly, a'r oriau pryd y byddant ar gael felly;
  - enw a chyfeiriad yr archwilydd;
  - y darpariaethau a geir yn adran 30 ac adran 31 o'r Ddeddf; ac
  - dyddiad a bennwyd o dan Reoliad 21.
- 14 Nid wyf wedi cael digon o dystiolaeth i ddangos bod y Cyngor wedi cydymffurfio â gofynion y Ddeddf. Felly, rwyf wedi pennu 18 Medi 2018 fel y dyddiad y gall etholwyr lleol ddechrau arfer eu hawliau o dan y Ddeddf mewn perthynas â chyfrifon 2015-16 a 2016-17.

## Mae'r Cyngor wedi methu â chynnal cofnodion cyfrifyddu priodol i gofnodi ei incwm a'i wariant ar gyfer 2015-16 a 2016-17

- 15 Mae Rheoliad 6 o Reoliadau Cyfrifon ac Archwilio (Cymru) 2014 yn ei gwneud yn ofynnol i'r swyddog ariannol cyfrifol, sef y Clerc yn achos y Cyngor, benderfynu ar ran y corff, ar ôl ystyried arferion priodol, ei gofnodion cyfrifyddu, gan gynnwys y ffurf ar gyfrifon a'r cofnodion cyfrifyddu ategol, a'i systemau rheoli cyfrifyddu.
- 16 Nodir arferion priodol yng nghyhoeddiad Un Llais Cymru/Cymdeithas Clercod Cyngorau Lleol Governance and accountability for Local Councils in Wales: A Practitioners' Guide. Mae'r arferion priodol hyn yn ei gwneud yn ofynnol i'r Cyngor gadw llyfr arian neu rywbeth tebyg er mwyn cofnodi trafodion a chadw dogfennaeth wreiddiol er mwyn darparu tystiolaeth i gadarnhau trafodion a gofnodir yn y llyfr arian.
- 17 Nododd fy archwiliad, er i'r Clerc gadw rhestr o daliadau a nodyn o drosglwyddiadau rhwng cyfrifon banc, nad oes llyfr arian cyffredinol i gofnodi holl

drafodion y Cyngor. Er i'r Clerc baratoi mantolen ar ddiwedd y flwyddyn, nid wyf wedi gallu cysoni datganiad cyfrifyddu 2015-16 â'r cofnodion cyfrifyddu. Mae gwahaniaeth o £397 rhwng y balans terfynol ar 31 Mawrth 2015 yn unol â datganiad blynyddol 2014-15 a'r gyfriflen.

- 18 Dylai'r Cyngor gadw copïau o'r ddogfennaeth i ategu'r holl daliadau a wnaed. Roedd y ddogfennaeth a ddarparwyd i'w harchwilio yn gyfyngedig ac, o ganlyniad, ni allaf ddod i gasgliad ar gywirdeb na chyflawnrwydd y trafodion a gofnodwyd.

## Mae'r Cyngor wedi methu â chynnal trefniadau priodol i weinyddu'r gyflogres

- 19 Mae'r rhan fwyaf o Gynghorau Cymuned, megis Cyngor Cymuned Llanwnnen, yn cyflogi un swyddog i ymgymryd â rolau'r Clerc a'r Swyddog Ariannol Cyfrifol, sy'n rolau ar wahân yn gyfreithiol. Mae'r rhan fwyaf o'r swyddogion hyn yn gweithio'n rhan amser, gyda'u horiau yn amrywio o un neu ddau ddiwrnod yr wythnos, i ychydig o oriau y chwarter. Mae'r Clerc, fel un o swyddogion y cyngor, yn un o gyflogeion y Cyngor. Dylai'r Cyngor roi contract cyflogaeth sy'n nodi'r telerau ac amodau cyflogaeth i unrhyw gyflogeion. Mae contractau cyflogaeth yn rhoi eglurder ynglŷn â rôl a statws y clerch a'r trefniadau cydnabyddiaeth ar gyfer y swydd. Dylai'r Cyngor fod wedi sicrhau ei fod yn deall ei gyfrifoldebau wrth gyflogi'r Clerc.
- 20 Heblaw am rai eithriadau, mae'n rhaid i bob cyflogwr ddiwynnu Treth Incwm a Chyfraniadau Yswiriant Gwladol cyflogeion o gyflog cyflogeion ac anfon y symiau a ddiwynnir i CThEM bob mis neu chwarter ynghyd â Chyfraniadau Yswiriant Gwladol y cyflogwr. Gelwir y system hon yn Talu Wrth Ennill (TWE). Mae'n rhaid i ddiwyniadau TWE gael eu talu i CThEM. Mae'n rhaid i bob cyflogwr hefyd gadw cofnodion cyflogres.
- 21 Er bod y Clerc wedi cael taliadau cyflog yn 2015-16 a 2016-17 nid yw'r Cyngor wedi darparu unrhyw gofnodion cyflogres i ategu'r symiau a dalwyd fel cyflog i'r Clerc. Ni ddarparwyd contract cyflogaeth er mwyn i mi ddilysu'r symiau hyn.
- 22 Nid yw'r Cyngor wedi darparu tystiolaeth i ddangos ei fod wedi ei eithrio rhag cofrestru ar gyfer TWE.
- 23 Yn seiliedig ar y dystiolaeth rwyf wedi'i gweld mewn perthynas â chyflogres a TWE yn y Cyngor, rwyf wedi dod i'r casgliad na chadwyd cofnodion cyflogres priodol fel sy'n ofynnol.
- 24 Heb unrhyw gofnodion, ni allaf ddod i gasgliad ynghylch p'un a dalwyd y cyflog priodol i'r Clerc ai peidio na ph'un a wnaed y didyniadau TWE priodol ai peidio.

## Ni pharatôdd y Cyngor gyllideb ar gyfer 2015-16 na 2016-17 ac ni chymeradwyodd y praesept a godwyd ar dalwyr y dreth gyngor ar gyfer y blynyddoedd ariannol hyn

- 25 Mae Deddf Cyllid Llywodraeth Leol 1992 yn ei gwneud yn ofynnol i gynghorau gyfrifo'r gyllideb flynyddol a'i chymeradwyo. Mae Adran 41 o'r Ddeddf hon yn caniatáu i Gynghorau gyhoeddi praesept y penderfynir arno yn unol ag Adran 50, drwy gyfrifo'r gofyniad cyllidebol.
- 26 Er gwaethaf y gofyniad statudol hwn, mae'r gyllideb yn bwysig am y rhesymau canlynol:
- mae'n arwain at bennu'r praesept ar gyfer y flwyddyn;
  - mae'n rhoi awdurdod i'r cyngor wario'r arian yn unol â'r cynlluniau gwariant cymeradwy a'r rheoliadau ariannol; ac
  - mae'n rhoi sylfaen ar gyfer monitro cynnydd yn ystod y flwyddyn drwy gymharu ffigurau gwirioneddol â gwariant arfaethedig.
- 27 Mae'r gyllideb yn elfen hollbwysig o drefniadau rheoli ariannol effeithiol ac atebolrwydd ac yn y pen draw, mae'n lleihau faint o amser y mae cynghorau yn ei dreulio yn rheoli eu hadnoddau ariannol. Yn niffyg trefniadau digonol ar gyfer pennu a monitro cyllidebau, ni all cynghorau reoli arian cyhoeddus yn effeithiol na dangos eu bod yn cydymffurfio â gofynion statudol.
- 28 Yn ystod fy archwiliad ni lwyddais i ganfod tystiolaeth fod y Cyngor wedi paratoi cyllideb ar gyfer blynyddoedd ariannol 2015-16 na 2016-17.
- 29 Nododd fy archwiliad o gofnodion y Cyngor, er bod y cofnodion yn cofnodi bod y praesept blynyddol wedi'i dderbyn, nad oes unrhyw gofnod bod y Cyngor erioed wedi cymeradwyo cyflwyno praesept i Gyngor Sir Penfro.

## Er bod gan y Cyngor wefan, nid yw'n cyhoeddi pob dogfen y mae'n ofynnol iddo ei chyhoeddi yn electronig

- 30 O dan Ddeddf Llywodraeth Leol (Democratiaeth) (Cymru) 2013 (Deddf 2013) mae'n ofynnol i bob cyngor lleol gyhoeddi ei fanylion cyswllt a manylion ei aelodau a chofnodion o'i drafodion ar y rhyngwyr. O dan Ddeddf 2013 mae hefyd yn ofynnol i bob cyngor gyhoeddi ei gofrestr o fuddiannau aelodau, hysbysiadau cyhoeddus a chyfrifon archwiliedig yn electronig.
- 31 Mae'r newidiadau a gyflwynwyd gan Ddeddf 2013 yn gwneud cynghorau lleol yn fwy atebol i'w hetholwyr. Yn 2015, derbyniodd y Cyngor £500 gan Lywodraeth Cymru er mwyn helpu i ddatblygu gwefan.



- 32 Nododd fy archwiliad, er bod y Cyngor wedi creu gwefan, nad yw wedi cyhoeddi'r wybodaeth y mae'n ofynnol iddo ei chyhoeddi'n electronig. Nid yw'r wefan yn cynnwys copi o gofrestr y Cyngor o fuddiannau aelodau, hysbysiadau archwilio na chyfrifon archwiliedig. Dim ond cofnodion ar gyfer cyfarfodydd a gynhaliwyd rhwng mis Ebrill a mis Medi 2016 y mae'r Cyngor wedi eu cyhoeddi.

## Camau gweithredu a gymerwyd eisoes gan y Cyngor

- 33 Mae'n bwysig bod y Cyngor yn dysgu o'r digwyddiadau hyn. Deallaf fod y Cyngor eisoes wedi cymryd rhai camau, gan gynnwys y canlynol:
- mae'r Cyngor wedi sicrhau ei fod yn cydymffurfio â'r gofynion ar gyfer arddangos a chyhoeddi'r hysbysiad archwilio ar gyfer archwiliad 2017-18;
  - mae'r clerc presennol wedi cyflwyno llyfr arian i gofnodi derbyniadau a thaliadau;
  - mae'r Cyngor wedi cyflwyno contract cyflogaeth ar gyfer ei glerc presennol;
  - prosesir TWE drwy System Cofnodi Amser Real CThEM; ac
  - mae cofnodion o gyfarfodydd y Cyngor bellach yn cael eu cyhoeddi ar ei wefan.

## Argymhellion

Arddangosyn 2: Mae fy argymhellion i'r Cyngor fel a ganlyn:

Argymhellion	
A1	Rhaid i'r Cyngor sicrhau y caiff y Datganiad Cyfrifon ei baratoi a'i gymeradwyo cyn 30 Mehefin bob blwyddyn.
A2	Rhaid i'r Cyngor sicrhau bod cynghorwyr unigol yn deall eu cyfrifoldebau am y cyfrifon blynyddol.
A3	Rhaid i'r Cyngor sicrhau y caiff y cyfrifon eu cyflwyno i'w harchwilio'n brydlon ar ôl iddynt gael eu cymeradwyo.
A4	Rhaid i'r Cyngor sicrhau ei fod yn cydymffurfio â gofynion y Ddeddf a'r Rheoliadau yn brydlon mewn perthynas â chyfrifon 2015-16 a 2016-17.
A5	Dylai'r Cyngor gadw digon o dystiolaeth i ddangos ei fod wedi cydymffurfio â'i ddyletswyddau statudol.
A6	Rhaid i'r Cyngor sicrhau ei fod yn paratoi ac yn cynnal cofnodion cyfrifyddu priodol fel sy'n ofynnol gan Reoliadau Cyfrifon ac Archwilio (Cymru) 2014.
A7	Rhaid i'r Cyngor sicrhau ei fod yn rhoi contract cyflogaeth y cytunwyd arno sy'n nodi telerau ac amodau cyflogaeth y Clerc.

## Argymhellion

A8	Dylai'r Cyngor adolygu'r trefniadau ar gyfer talu cyflog y Clerc er mwyn cadarnhau bod y cyflog a didyniadau ar gyfer treth (gan gynnwys treth ar y lwfans treuliau) wedi'u cyfrifo'n gywir.
A9	Rhaid i'r Cyngor ystyried a yw'n ofynnol iddo gofrestru â CThEM a gweithredu system TWE ai peidio.
A10	Rhaid i'r Cyngor sicrhau ei fod yn paratoi cyllideb yn unol â Deddf Cyllid Llywodraeth Leol 1992 cyn pennu ei braesept.
A11	Rhaid i'r Cyngor sicrhau y caiff ei benderfyniad i gyflwyno praesept ei gofnodi yn ei gofnodion.
A12	Dylai'r Cyngor fonitro ei wariant yn erbyn y gyllideb hon drwy gydol y flwyddyn (e.e. drwy gymharu gwariant yn erbyn y gyllideb bob chwarter).
A13	Rhaid i'r Cyngor sicrhau ei fod yn nodi pa ddogfennau y mae angen eu cyhoeddi'n electronig a gwneud trefniadau priodol i gyhoeddi'r rhain ar ei wefan yn brydlon.

## Y camau nesaf

- 34 Mae'n ofynnol i'r Cyngor, o dan adran 25 o Ddeddf Archwilio Cyhoeddus (Cymru) 2004, ystyried yr adroddiad hwn mewn cyfarfod llawn o'r Cyngor o fewn mis i ddyddiad cyhoeddi'r adroddiad. Yn y cyfarfod, bydd angen i'r Cyngor benderfynu:
- p'un a yw'r adroddiad yn ei gwneud yn ofynnol iddo gymryd unrhyw gamau;
  - p'un a gaiff yr argymhellion yn yr adroddiad eu derbyn; ac
  - pha gamau gweithredu (os o gwbl) y bydd yn eu cymryd i ymateb i'r adroddiad a'r argymhellion.
- 35 Yna, bydd angen i'r Cyngor baratoi ymateb ysgrifenedig a chytuno ar eiriad yr ymateb hwnnw â mi cyn cyhoeddi ei ymateb.

Anthony Barrett

Archwilydd Cyffredinol Cynorthwyol

Dros ac ar ran Archwilydd Cyffredinol Cymru

6 Medi 2018



Wales Audit Office  
24 Cathedral Road  
Cardiff CF11 9LJ

Tel: 029 2032 0500

Fax: 029 2032 0600

Textphone: 029 2032 0660

E-mail: [info@audit.wales](mailto:info@audit.wales)

Website: [www.audit.wales](http://www.audit.wales)

Swyddfa Archwilio Cymru  
24 Heol y Gadeirlan  
Caerdydd CF11 9LJ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: [post@archwilio.cymru](mailto:post@archwilio.cymru)

Gwefan: [www.archwilio.cymru](http://www.archwilio.cymru)